

Assartuutinut, inuussutissarsiummik ingerlataqartunut, pisortat suliffeqarfutaannut, katerisimaartarnernut allanullu tunngatillugu killilersuigallarnerit inerteqquteqartitsinerillu pillugit Namminersorlutik Oqartussat nalunaarutaat

Nappaatit tunillaassortut akiorniarlugit iliuutsit pillugit Inatsisartut peqqussutaanni nr. 20, 12. november 2001-imeersumi, Inatsisartut inatsisaatigut nr. 1, 1. april 2020-meersutigut allanngortinneqartumi, §§ 6, 12 a aamma 12 b, aamma § 29, imm. 2 malillugit aalajangersarneqarpoq:

Atuuffi

§ 1. Nalunaarut Kalaallit Nunaannut tamarmut atuuppoq.

Imm. 2. Nalunaarut napparsimavinnut, nakorsiartarfinnut kiisalu nakorsiartarfinnut namminersortunut niuertarfinnilu peqqissaanermik naalagaaffimmit akuerisaallutik ingerlatani ingerlatsisunut atorfekartitsiffiusunullu atuutinngilaq.

Ininut kikkunnilluunniit iserfigineqarsinnaasunut piumasaqaatit

§ 2. Inuussutissarsiummik ingerlatallit aamma suliffeqarfuit pisortanit pigineqartut ininik kikkunnit tamanit iserfigineqarsinnaasunik pigisallit piumasaqaatinik makkuninnga naammassinnissimassapput:

- 1) Inuit ininut qatserisartoqarfinni oqartussaasunik akuerineqarsimasunut isersinnaatitaasut amerlanerpaaaffissaasa 50% akuerineqarsinnaapput.
- 2) Init ajornanngippat imatut pequsersorsimassapput tuniluunniisaq minnerpaaffianiitinneqassalluni, tassunga ilaalluni pisisut pulaartullu imminnut qanillinnginnissaat periarfissaqartillugu.
- 3) Inimi ininiluunniit tamanit iserfigineqarsinnaasuni eqqiluisaarnissaq ileqqorissaarnissarlu pillugit Nunatta Nakorsaaneqarfianiit paasissutissanik nivinngaasoqassaaq.
- 4) Sulisut tamarmik Nakorsaaneqarfuiup eqqiluisaaqqissaarnissamik ileqqorissaarnissamillu innersuussutaanik malinninnissaat qulakkeerneqassaaq.
- 5) Pisisunut pulaartunullu ajornanngippat imermik qaorsaammillu imaluunniit assammut spritimik peqassaaq.
- 6) Nerisassanik poortorneqarsimanngitsunik tuniniaanermi sulisut aaqqateqassapput.

§ 3. Inuussutissarsiummik ingerlatalik politiit naliliinerat malillugu § 2-mik unioqqutitsisimappat, inuussutissarsiummillu ingerlatalik § 2-mik malinninnissaa ilimagineqannngippat, inimik piffissami aalajangersimasumi tamanut matoqqatitsinissaannik politiit peqqusisinnaapput.

Assartuutinut piumasagaatit

§ 4. Angallassissutit issiaffiusinnaasut qaangerlugit ilaasoqaqqusaanngillat.

Pineqaatissiissutit

§ 5. Inummut §§ 2-mik imaluunniit § 4-mik unioqqutitsisumut imaluunniit § 3, malillugu peqqusinermik malinnikkumanngitsumut Kalaallit Nunaannut Pinerluttulerinermik Inatsit malillugu pineqaatissiisoqarsinnaavoq.

Imm. 2. Ingerlatseqatigiiffit il.il. (inatsisilerinermi inuttut immikkoortutut isigineqartut) pinerluttulerinermik inatsimmi kapitali 5-imi malittarisassat malillugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput.

Atuutilersitsineq aamma atuunneranut piffissaliussaq

§ 6. Nalunaarut ulloq 25. april 2020, nal. 8:00 atuutilissaq.

Imm. 2. Nalunaarut malillugu killilersuinerit, inerteqquteqartitsinerit, peqqusinerit il.il. 1. juni 2020 tikillugu atuutissapput.

Nalunaarummi allami allanngortitsinerit

§ 7. Illoqarfimmi Nuummi katerisimaartarnernut allanullu tunngatillugu killilersuigallarnerit inerteqquteqartitsinerillu pillugit Namminersorlutik Oqartussat nalunaarutaat nr. 10, 14. april 2020-meersumi § 2-mi ima ilanngunneqarput: “ **§ 2.** Nalunaarut malillugu killilersuinerit, inerteqquteqartitsinerit, peqqusinerit il.il. 25. april 2020-mi nal. 8:00 tikillugu atuutissapput.”

Namminersorlutik Oqartussat, ulloq 23. april 2020

Martha Abelsen

/

Tine Pars

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut